



Broj: 05/1-50-13-29-6-8/15
Sarajevo, 19.11.2014. godine

IZVJEŠTAJ

sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s direktorom i zamjenikom direktora Direkcije za koordinaciju policijskih tijela BiH

Sastanak je održan 19.11.2014., s početkom u 14 sati, u prostorijama Direkcije za koordinaciju policijskih tijela BiH u Sarajevu. Bili su prisutni: Mirsad Vilić, direktor, i Mile Jurić, zamjenik direktora Direkcije za koordinaciju policijskih tijela BiH, Žiko Krunić, predsjednik Nezavisnog odbora, Ilma Mehić-Jusufović i Nikola Džambas, članovi Nezavisnog odbora, te Ivana Lovrić, sekretar Nezavisnog odbora.

Direktor Direkcije za koordinaciju policijskih tijela BiH Mirsad Vilić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Žiko Krunić, predsjednik Nezavisnog odbora, kratko je obrazložio razlog posjete. Reкао je da je posjeta organizirana u skladu s Planom i programom rada Nezavisnog odbora za 2014. u cilju održavanja kontinuiteta saradnje s policijskim agencijama iz svoje nadležnosti. Također, naglasio je da Nezavisni odbor može biti od velike pomoći u radu Direkcije za koordinaciju policijskih tijela BiH kao spona između njih i Vijeća ministara BiH, tj. Zajedničke komisije za odbranu i sigurnost BiH.

Direktor Direkcije za koordinaciju policijskih tijela BiH Mirsad Vilić kratko je upoznao članove Nezavisnog odbora sa stanjem u Direkciji od preuzimanja dužnosti novog rukovodstva. Osvrnuo se na događaje od 7.2.2014. u Sarajevu koji su ga zatekli, navodeći da je od tada do danas znatno poboljšan rad u Direkciji. Napomenuo je da je potpisan Sporazum o zajedničkom djelovanju na području Kantona Sarajevo (**Sporazum o međusobnom pružanju pomoći i operativnoj saradnji agencija za provođenje zakona**) između Direkcije za koordinaciju policijskih tijela BiH, Državne agencije za istrage i zaštitu, Granične policije BiH, Federalnog ministarstva unutrašnjih poslova - Federalne uprave policije i Ministarstva unutrašnjih poslova Kantona Sarajevo. Na osnovu tog sporazuma, svaka od navedenih agencija može da zatraži i pruži pomoć drugim agencijama.

Direktor i zamjenik direktora Direkcije za koordinaciju policijskih tijela BiH informirali su članove Nezavisnog odbora i o problemima na planu kadrovske popunjenosti. Naglasili su da za mjesec dana primaju 49 novih kadeta na obuku, a oni će, u maju 2015. godine, stupiti u radni odnos u Direkciji, ali to je i dalje nedovoljno zbog većeg broja policijskih službenika

koji odlaze u penziju. Zato je uvijek prisutan problem manjka oko 30% policijskih službenika. Iz tog razloga je traženo od Vijeća ministara BiH da svake godine bude primljeno novih 50 policijskih službenika.

Također, naglasili su da imaju veoma dobru saradnju s međunarodnom zajednicom, tj. ambasadama Sjedinjenih Američkih Država, Velike Britanije, Austrije, Njemačke i Francuske koje su izdvojile velika novčana sredstva za obuku policijskih službenika, kao i za nabavku materijalno-tehničkih sredstava.

Zamjenik direktora Mile Jurić naglasio je važnost pitanja saradnje s EUROPOL-om. Bosna i Hercegovina ostvaruje saradnju s EUROPOL-om na osnovu Strateškog sporazuma o saradnji između Vijeća ministara BiH i Ureda Evropske policije. Trenutno su usmjerene aktivnosti na potpisivanje operativnog sporazuma koji podrazumijeva proširenje saradnje u borbi protiv teških oblika međunarodnog kriminala.

Članovi Nezavisnog odbora na kraju su naglasili da će Nezavisni odbor i dalje, u okviru svojih nadležnosti, pružati podršku radu Direkcije za koordinaciju policijskih tijela i poželjeli im mnogo uspjeha.

Sastanak je završen u 16 sati.

SEKRETAR NEZAVISNOG ODBORA

Ivana Lovrić